



PROXECTO DE CONVENIO DE COLABORACIÓN ENTRE O EXCMO. CONCELLO DE PONTEVEDRA E A FUNDACIÓN "AMIGOS DE GALICIA" PARA O DESENVOLVEMENTO DUN PLAN DE COBERTURA DE NECESIDADES BÁSICAS DAS FAMILIAS CARENTES DE RECURSOS ECONÓMICOS DO CONCELLO DE PONTEVEDRA.

En Pontevedra a 28 de outubro de 2013

REUNIDOS

Dunha banda, don Miguel Anxo Fernández Lores, con DNI nº 35.427.948-J, actuando en nome e representación do Concello de Pontevedra, no uso das facultades que se lle atribúen na súa condición de Alcalde-Presidente do mesmo, ao abeiro do disposto no artigo 24.4.ñ) da Lei 7/1985, do 2 de abril, reguladora das bases do réxime local, modificada pola Lei 57/03 do 16 de decembro de medidas para a modernización do Goberno Local, así como o disposto na artigo 41 do R.D. 2568/1986, do 28 de novembro polo que se aproba o Regulamento de Organización, Funcionamento e Réxime Xurídico das Entidades Locais.


E doutra, don Jesús Busto Peleteiro, en calidade de Director Xeral da Fundación "AMIGOS DE GALICIA", co CIF G-15859911, con domicilio na Rúa Betanzos, 18 Planta 1-D de Santiago de Compostela, actuando en nome e representación da mesma, tal e como acredita o seu nomeamento segundo acta do 31 de xullo de 2010 onde foi constituída a nova Xunta Directiva.

Interveñen en función dos seus respectivos cargos e, no exercicio das facultades que para convir en nome das entidades que representan teñen conferidas

MANIFESTAN

- I. Que as Administracións Públicas poden celebrar convenios de colaboración con persoas tanto de dereito público como privado ao abeiro do disposto no artigo 88 da Lei 30/92, de Réxime Xurídico das Administracións Públicas e do Procedemento Administrativo común, modificada pola Lei 4/199 do 13 de xaneiro.
- II. Que segundo os datos que obran nos rexistros dos servizos sociais municipais, no concello de Pontevedra existe un número importante de persoas, incrementado nestes últimos anos, en situación de exclusión social, familias con poucos ingresos, anciáns, mozos/as... que requiren da cobertura das súas necesidades básicas.
- III. Que a Lei 7/1985, do 2 de abril, Reguladora das Bases do Réxime Local, no seu artigo 25.2.k atribue aos concellos a prestación de servizos sociais e a promoción e reinserción social. E o artigo 20 de Lei 5/1997, do 22 de xullo, de Administración Local de Galicia, establece que os concellos para a xestión dos seus intereses e no ámbitos das súas competencias, poderán promover toda clases de actividades e prestar tódolos servizos públicos que contribúan a satisfacer as necesidades dos veciños.

- IV. Que o Concello, como poder público, ten que asegurar a protección das persoas en situación de necesidade, desamparo, en circunstancias graves ou de urxente necesidade por carencias económicas e/ou socio-familiares. Puidendo dar a cobertura por si mesmos, ou mediante convenios de colaboración con entidades de iniciativa social de recoñecida solvencia.
- V. Que a Fundación "AMIGOS DE GALICIA" é recoñecida pola súa constante actividade social que na cidade de Pontevedra se centra, entre outras, na cobertura de necesidades básicas e alimenticias das familias dando resposta deste xeito as súas necesidades en diversos ámbitos. A súa actividade vai máis alá asesorando e desenvolvendo itinerarios de inserción coa finalidade de acadar a integración laboral daquelas persoas de difícil inserción social, polo que a súa actividade ven a ter un carácter complementario ao traballo de institucións como Cáritas, Sociedade San Vicente de Paul e o Comedor de San Francisco, entre outras.
- VI. Que dito recurso ven funcionando na cidade de Pontevedra dende hai anos, dando cobertura as necesidades primarias de alimentación, vestido e produtos de primeira necesidade a aquelas persoas marxinadas socialmente que se atopan en situación de exclusión social, atendendo a unha media anual de 525 persoas so no concello de Pontevedra.
- VII. Que dende o inicio da súa actividade no Concello de Pontevedra a demanda viuse incrementada dun xeito alarmante, polo que na actualidade ven atendendo a persoas derivadas dos servizos sociais deste concello
- VIII. Que tendo avaliado que o traballo da Fundación "AMIGOS DE GALICIA" cumpre unha función social necesaria para complementar a rede de dispositivos de accións voluntarias que constituen o terceiro sector ou sector solidario, considérase necesario formalizar esta colaboración a través dun convenio de colaboración coa finalidade de contribuir a dar unha cobertura ás necesidades básicas do colectivo de persoas en situación de exclusión socio-laboral.



De acordo co exposto, as partes comparecentes, na representación que ostentan,

ACORDAN

Subscribir un convenio de colaboración para o desenvolvemento dun programa de cobertura de atencións básicas para persoas en situación de exclusión social, con suxeición ás seguintes

CLÁUSULAS

PRIMEIRA.- Obxecto


O presente convenio ten por obxecto *acobertura de necesidades básicas das familias carentes de recursos económicos do concello de Pontevedra*

SEGUNDA.- Contido do programa e actuacións a desenvolver.

O reparto de produtos de primeira necesidade realizarase na ubicación determinada polo concello, actualmente os baixos do pabellón de deportes na rúa Juan Manuel Pintos.


O programa dará cobertura, entre outros, aos seguintes colectivos:

- persoas en risco de exclusión social
- familias con poucos ingresos,
- anciáns
- mozos/as



As actuacións do programa consistirán na entrega de produtos de primeira necesidade así como aqueles outros imprescindíbeis para unha vida normalizada centrándose fundamentalmente naquelas familias con menores a cargo facilitando, na medida do posible, unhas condicións de vida máis saudables. Manterase unha liña de colaboración e coordinación cos Servizos Sociais municipais, así como cos demais dispositivos da área de Benestar Social do Concello: Unidade de Atención aos Drogodependentes e Unidade de Día Municipal, etc..).

TERCEIRA.- Persoal de atención.



A Fundación Amigos de Galicia, contará co persoal axeitado para a prestación que desenvolve, que, alo menos, contará con:

- Persoal contratado :
 - I.Coordinador de repartos
 - II. Chófer
 - III. Técnico de emprego
 - IV. Traballador Social
 - V. Auxiliar Administrativo
- Persoal voluntario: para labores de reparto e elaboración de paquetes de alimentos.

CUARTA.- Orzamento

Para a desenvolvemento das actuacións sinaladas na cláusula anterior o Concello de Pontevedra achegará, dos orzamentos municipais para o ano 2013, a cantidade de **10.000,00 € (DEZ MIL EUROS)**, que será actualizada anualmente conforme ao incremento do IPC rexistrado polo Instituto Galego de Estatística para o correspondente ano

As achegas feitas polo Concello de Pontevedra serán destinadas a sufragar os gastos do persoal necesario para o funcionamento da fundación no concello de Pontevedra sinalado na cláusula anterior, así como calquera outro gasto necesario para o axeitado desenvolvemento do programa (gas, electricidade, compra alimentos, etc..).

QUINTA.- Xustificación e Pago

A entidade presentará a xustificación de todos os gastos da actividade desenvolada no marco do convenio, referidos a cada período anual de vixencia.

A data límite para a presentación da xustificación será para cada anualidade a de 31 de outubro do exercicio correspondente, e deberá referirse aos gastos efectivamente realizados, segundo o parágrafo anterior, a esa data.

Os gastos realizados no período comprendido entre o 1 de novembro e 31 de decembro de cada exercicio poderán imputarse como gasto correspondente a anualidade inmediatamente posterior.

O Concello de Pontevedra realizará os pagamentos contra xustificación dos gastos realizados, mediante facturas, nóminas, etc, que deberán ser presentados pola Fundación Amigos de Galicia perante o concello.

Poderán efectuarse pagos parciais que se xustificarán do xeito previsto anteriormente.

A presentación da conta xustificativa fóra do prazo indicado constitúe unha infracción leve por incumprir as obrigas recollidas na normativa reguladora das subvencións públicas, que dará lugar á imposición das sancións legalmente previstas.

A falta de presentación de xustificación unha vez transcorridos os prazos salientados, dará lugar ao requirimento de xustificación por parte do concello, no prazo improrrogable de 15 días. A falta de presentación da xustificación en este novo prazo levará a perda da subvención polo que respecta ao período/anualidade non xustificada, pero manterá a vixencia ao respecto de períodos/anualidades posteriores.

O Concello someterase á normativa vixente en materia de subvencións, Lei 38/2003, do 17 de novembro, xeral de subvencións, e o seu regulamento de desenvolvemento aprobado polo R.D.887/2006 do 21 de xuño e da Ordenanza Xeral Reguladora de Subvencións do Concello de Pontevedra. Segundo o establecido no artigo 5º da devandita Ordenanza, e tendo en conta que a actividade a financiar por este convenio é de especial interese público e social, a porcentaxe subvencionabel polo Concello poderá ser do 100% do custo da actividade, sen que en ningún momento supere a contía total prevista na cláusula cuarta do presente convenio.

SEXTA.- Modificación do Convenio.

Toda alteración das condicións tidas en conta para a concesión desta axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación da contía da axuda contemplada no presente

Ao abeiro do previsto na Ordenanza Xeral reguladora das subvencións no Concello de Pontevedra a Fundación "AMIGOS DE GALICIA" ten a obriga de presentar unha declaración de axudas ou subvencións concedidas para o mesmo fin que o estipulado neste convenio.

A suma do conxunto das axudas solicitadas e/ou concedidas para o obxecto do convenio non poderá superar o 100 % do custo da actividade a desenvolver.


SÉTIMA.- Comisión de Seguimento

O Concello ostentará a dirección, supervisión e control das tarefas obxecto do convenio constituíndose para tal fin unha comisión mixta de seguimento, control e avaliación á que serán sometidas tódalas cuestións derivadas do desenvolvemento deste convenio, así como a resolución de cantas dúbidas poidan xurdir sobre o mesmo.

Esta comisión estará composta en representación do Concello de Pontevedra polo/a Concelleiro/a Delegado/a da Área de Benestar Social ou persoa na que delegue, polo/a Xefe/a de Servizo de Benestar Social e a Xefa de Sección de servizos sociais; e pola Fundación Amigos de Galicia o presidente ou persoa da entidade na que delegue, e por dúas persoas máis.


A comisión terá as seguintes funcións:

- 1.- Facer o seguimento e control do cumprimento do convenio.
- 2.- Interpretar e resolver as dúbidas, que se poidan suscitar na aplicación do convenio.



OITAVA.- Causas de resolución.

Sen prexuízo das causas xerais de resolución dos contratos previstas no Real Decreto Legislativo 3/2011, de 14 de novembro, polo que se aproba o Texto Refundido da lei de Contratos do Sector Público, tamén serán causa de resolución do presente convenio e darán lugar, no seu caso, ó reintegro das cantidades percibidas cos seus correspondentes xuros, as seguintes:

- 
- O incumprimento de calquera das cláusulas establecidas no mesmo.
 - A aplicación dos fondos outorgados no convenio para fins distintos dos que motivaron a súa concesión.
 - A falta de xustificación do emprego das cantidades recibidas.

NOVENA.- Publicidade, seguimento e colaboración.

1.- A Fundación Amigos de Galicia obrígase a:

- a) Facer constar en todo tipo de publicidade e información que se realice no desenvolvemento deste programa, a participación e colaboración do Concello de Pontevedra e o seu correspondente logotipo.
- b) Remitir anualmente ao Concello de Pontevedra un informe detallado das actuacións levadas a cabo ó abeiro deste convenio.
- c) Facilitar a actuación dos técnicos dos servizos sociais da Concellería de Benestar Social do Concello de Pontevedra no referente ó seguimento das actividades obxecto da axuda.
- d) Ter informado aos servizos sociais da Concellería de Benestar Social do Concello

de Pontevedra do desenvolvemento das actividades subvencionadas, así como calquera variación de horarios, lugar de entrega dos paquetes ou calquera outra circunstancia.

- e) Facilitar toda a información que lle sexa requirida pola Intervención Xeral do Concello de Pontevedra, no exercizo das súas funcións de fiscalización e control do destino das axudas.

2.- A Fundación Amigos de Galicia, entidade beneficiaria do presente convenio, presta o seu consentimento para incluír e facer públicos, se así se estimase, no rexistro público de axudas, subvencións e convenios

Os datos referidos integrarán un ficheiro cuxo responsable será o Concello de Pontevedra, ante quen se poderán exercitar os dereitos de acceso, rectificación, cancelación e oposición.

DÉCIMA.- Relación laboral.

A sinatura do presente convenio non implicará relación laboral, ou de calquera outra natureza, entre as persoas ou profesionais que desenvolvan as accións que constitúen o obxecto deste convenio co Concello de Pontevedra, de tal xeito que, por este concepto, non se lle poderá esixir ao Concello de Pontevedra responsabilidade algunha, nin directa nin subsidiaria.

O Concello de Pontevedra poderá comprobar en todo momento o cumprimento por parte da Fundación Amigos de Galicia, das obrigas laborais e de aseguramento do persoal destinado a executar os servizos obxecto deste convenio.

DECIMO PRIMEIRA.- Réxime xurídico.

O presente convenio ten carácter administrativo de acordo co disposto no artigo 4 do Texto Refundido da Lei de Contratos do Sector Público e demais normativa de aplicación en materia de contratos.

En caso de incumprimento do presente convenio, transgresión na súa execución ou desistimento pola outra parte procederase á súa inmediata resolución. Concorridos tales supostos esta entidade reintegrará ao Tesouro do Concello de Pontevedra as contías aboadas, cos xuros a que deán lugar.

As lagoas ou controversias que xurdidas na aplicación do presente convenio interpretaranse e resolveranse motivadamente pola Administración municipal, previo ditame non vinculante da comisión á que fai referencia a cláusula sexta, contra estas resolucións e polo carácter administrativo deste convenio, resolveranse na orde xuridiccional contencioso administrativo.

DÉCIMO SEGUNDA.- Duración.

O presente convenio terá unha vixencia de 4 anos a partir do 1 de xaneiro do ano 2013, prorrogándose por períodos anuais, ata un máximo de 6 anos, mediante o correspondente acto formal.

E, en proba de conformidade cos termos do convenio, as partes comparecentes asinan e rubrican por triplicado exemplar, no lugar e data indicados na cabeceira.

O ALCALDE-PRESIDENTE DO CONCELLO DE PONTEVEDRA O DIRECTOR XERAL DA FUNDACIÓN AMIGOS DE GALICIA



Asdo.: Miguel Anxo Fernández Lores

A handwritten signature in black ink, appearing to be "J. Busto Peleteiro".

Asdo.: Jesús Busto Peleteiro